

La entonación y el conxunto de rasgos prosódicos na carauterización d'una llingua¹

RUTH GONZÁLEZ RODRÍGUEZ, MIGUEL CUEVAS ALONSO,
LILIANA DÍAZ GÓMEZ, CARMEN MUÑIZ CACHÓN, M^a JESÚS LÓPEZ BOBO

I. ENTAMU

Nun cabe la menor dubia de que los rasgos prosódicos manifestaos na fala d'un individuu delaten la so pertenencia a determinada comuidá llingüística. Como yá afirmare T. Navarro Tomás nel so *Manual de Entonación Española* (pág. 9) «las inflexiones melódicas de la palabra sirven juntamente a la declaración del pensamiento, a la expresión de los movimientos del ánimo y a la manifestación de hábitos y maneras de decir de carácter local». Nesti sen, los rasgos gramaticales y semánticos son fáciles de neutralizar mentanto que los aspeutos fónicos, sobre too los qu'a- tañen a la entonación, constituyen ún de los aspeutos menos alterables na fala d'un individuu.

Cola debida instrucción, ye cencielo camudar los vezos morfolóxicos, sintáuticos y semánticos col envís d'algamar un usu correutu de la norma, mentes que los cambios tonales dependen d'un número complexu de factores difíciles de discernir intuitivamente. Podemos pidi-y a una persona que llevante'l pie drechu y, masque desconoz el número pergrande de procedimientos que'l nuesu celebru tien de facer pa llevalo a cabu, el suxetu sedrá quién a llevantalu. Del mesmu mou, podemos pidi-y a un individuu que diga *caso* y *casó* y pronunciaralo ensin problemes, anque nun sepa que modificar parámetros como la intensidá, la frecuencia fundamental o la duración pa producir tal efeutu, amás de los xestos articulatorios responsables de la realización de los soníos integrantes de la pallabra. Asina mesmo, sedrá a emitir y percibir diferencies ente *El rapacín xugaba col pitín* —asertiva— y *¿El rapacín xugaba*

¹ Esti trabayu foi realizáu gracias a la ayuda institucional p'AMPER-ASTUR de la Universidá d'Uviéu (referencia, MB-04-501-1) y a una beca de collaboración concedida pola Academia de la Llingua Asturiana.

col pitín? —interrogativa—. Nestos casos facemos dellos movimientos articulatorios y aerodinámicos que tienen consecuencias fonolóxiques, porque mos sirven pa distinguir significados. Sicasí, quien mueve'l diafragma, los músculos intercostales, les cuerdas vocales y los resonadores supraglóticos failo ensin saber los muérganos qu'intervienen nel procesu y carez de destreza tala pa controlalos ún a ún.

Cuando llevantamos el pie drechu y l'izquierdu alternativamente na marcha podemos andar ensin conocencia nenguna del funcionamientu neurolóxicu y motor del nuesu organismo y esto ye porque estos xestos tienen un caráuter funcional. Pero si maxinamos que ciertes investigaciones sofitaren que se pue conocer la procedencia xeográfica pela forma caminar ye posible qu'al miranos nun espeyu tratáremos de curiar los nuesos movimientos anque sedría difícil tener el control suficiente pa paecer orientales.

Esta anéudota sírvenos p'amosar lo difícil que resulta camudar voluntariamente los rasgos prosódicos cuando nun responden a patrones funcionales sinón más bien a la realización particular d'esos patrones nuna fastera determinada. D'esta miente, consideramos la entonación como ún de los elementos que delaten la procedencia xeográfica d'un individuu.

Les torgues qu'atopamos pa camudar globalmente una curva entonativa de mou voluntariu débese a la complexidá de factores qu'intervienan na realización de los rasgos prosódicos. Un análisis d'estos rasgos permitirános la identificación de les carauterístiques prosódiques de les llingües y de les sos variedaes dialeutales.

II. EL PROYEUTU AMPER

2. 1. Nacimientu y finalidá

Col envís de suprir l'ausencia d'estudios orientaos a la descripción y comparanza de patrones melódicos anicióse en 1998 un proyeutu internacional que tien como oxetivu l'estudiu de la prosodia de les llingües romániques. Cola participación de fonetistes y dialectólogos de dixebras países surde'l proyeutu AMPER, sigles que los sos promotores, los investigadores del Centre de Dialectologie de la Université Stendhal de Grenoble (Francia) —empobináu por Michel Contini— concedieron a esti gran proyeutu. El nome completu reza asina nes llingües nes que se ta trabayando:

- *Projet d'Atlas Multimédia Prosodique de l'Espace Roman*
- *Proyecto de Atlas Multimedia Prosódico de las Variedades Románicas*
- *Progetto di Atlante Multimediale Prosodico delle Varietà Romanze*
- *Projecto de Atlas Multimédia Geoprosódico das Variedades Românicas*
- *Proiect de Atlas Multimedia de Prozodie a Dialectelor Limbilor Romanice*

L'oxetivu principal del proyeutu ye analizar los aspeutos entonativos, asina como la intensidá y la duración silábica de les distintes variedaes xeoprosódiques de toles llingües romániques d'Europa, magar que ye incipiente l'ampliación del estudiu a les llingües romániques falaes n'otres fasteres non europees.

L'estudiu persigue dos finalidaes fundamentales: d'un llau, facer aportaciones teóriques sobre la entonación, contribuyir a la conocencia de les dixebras llingües y les sos variedaes dialeutales y ellaborar patrones entonativos carauterísticos de les zones del ámbitu románicu. D'otru llau, ha destacase la finalidá práutica d'esti trabayu, na so aplicación na reconocencia de llocutores en fonética forense, na descripción y entrenamiento de sistemes d'interacción home-máquina, y tamién nel desarrollu d'una ortoloxía entonativa, necesaria pa los medios de comunicación audiovisual.

Amás d'ello, nun podemos dexar de facer una mención al propósitu divulgador que tien esti proyeutu y que consiste na presentación d'una selección de les diferentes entonaciones de los espacios xeollingüísticos consideraos, a disposición del públicu en xeneral, cola creación d'un atles multimedia de fácil accesu n'internet.

2. 2. Grupos

A sabiendes de les torgues que supón enfrentáse a un trabayu de carauterístiques tales, non solo polo ambicioso, sinón tamién polo necesario d'una collaboración constante ente fonetistes y dialeutólogos, decidióse formar grupos de trabayu multidisciplinares en toa Europa. Asina, nacieron los distintos equipos d'investigación de Francia, Italia, Portugal, Rumanía y España.

Eugenio Martínez Celdrán, de la Universidá de Barcelona, ye'l direutor del grupu español y el promotor d'otros subgrupos qu'estudien les distintes variedaes dialeutales del español y les otres llingües peninsulares. Anguaño, hai grupos en delles comunidaes: en Galicia y Cataluña onde, amás del estudiu de les sos llingües vernáculas, estúdiase'l castellán faláu neses zones; n'Andalucía occidental y Extremadura; n'Andalucía oriental, Murcia y Canarias. Otru grupu estudia'l castellán faláu nel País Vascu mentanto que tamién se tán investigando nel centru peninsular otres variedaes dialeutales del castellanu. Por últimu, na Universidá d'Uviéu creóse un grupu de trabayu nomáu AMPER-ASTUR que mos encargamos de facer una descripción prosódica del asturianu, del gallego-asturianu y del castellán faláu n'Asturies.

2. 3. Metodoloxía xeneral d'AMPER

La perceición de los falantes de la entonación como un elementu carauterizador de la so llin-

gua nun ye suficiente p'amosar científicamente tal afirmación. Por ello foi necesariu'l diseñu d'un trabayu nel marcu de la fonética experimental qu'estudiare los rasgos prosódicos de les llingües romániques y les sos variedaes dialeutales. Esto va desembocar nel establecimientu de patrones entonativos que resulten comparables y, d'esti mou, ye pernecesario fixar una metodoloxía de trabayu común a tolos grupos en cuantes informantes, corpus y procedimientu d'análisis.

No que cinca los *informantes*, les primeres investigaciones tán faciéndose con mujeres d'ente 25 y 50 años, ensin estudios superiores y nacíes y habitantes del puntu d'encuesta al que representen. Contrólase amás la variable de la pertenencia a un entornu rural y urbanu, de mou que non sólo consiguimos información de calter dialeutal y fonéticu sinón tamién datos d'abondu valor pa la sociollingüística. Sicasí, tratándose d'un proyeutu a llargu plazu, el propósitu d'AMPER ye'l de seguir la investigación con homes de les mesmes carauterístiques socio-llingüísticas y xeográfiques. Nuna fase cabera, prevése algamar informantes homes y mujeres del mesmu entornu xeográficu y con estudios universitarios.

Una de les mayores torgues que se mos plantegaron na realización d'un estudiu fonéticu de la entonación foi la eleición del corpus de trabayu. Cola fin de que seja espontáneu y tamién afayadizu pa les nueses necesidaes, consideróse la creación de tres tipos de corpus: ún de frases «ad hoc», un corpus inducíu y el conocíu como ‘xera de mapa’.

Pal corpus «ad hoc» preparáronse una serie de frases nes que controlamos delles variables fonétiques y sintáutiques. Les frases compuestes por un SN (con/y ensin espansión) + V + SN (con/y ensin espansión) tán equilibraes en cuantes al númberu de sílabes y a la distribución de pallabres agudes, llanes y esdrúxules². Del conxuntu de les distintes variables resulta un corpus de 63 frases que tienen de pronunciase na modalidá asertiva ya interrogativa, faciendo un total de 126 frases. Esti ye'l corpus que se presenta nun orde aleatoriu a los informantes pa que lu llean tres vueltas, de mou que consiguimos a lo cabero un total de 378 frases de cada informante.

Amás d'esto, les grabaciones completáronse con dos corpus más de fala espontánea que tamién se repiten tres vueltas. El primeru ye'l corpus inducíu, que consiste na preparación d'una situación na que se conduz al informante a realizar delles entrugues y afirmaciones. El segundu ye la *xera de mapa* na que se presenta al informante un mapa d'un llugar maxináu con topónimos, a vegaes inventaos, pa respetar no posible a les restricciones fonétiques. L'encuestador tien otru mapa asemeyáu, anque non igual, y l'estímulu pa la charra vien dau por dalgunha entruga como pue ser el dir a la gueta d'una ayalga escondida nun determináu llugar y los pilancos qu'hai que superar pa llegar a ella.

² Más alantre amosaremos dellos exemplos concretos del corpus.

Nun cabe la menor dulda que nestos dos últimos tipos de corpus la espontaneidá ye casi total siempres que l'entrevistador algame un clima distendíu y de confianza. Sicasí, tien otros inconvenientes que faen que de momentu tolos grupos teamos analizando sólo'l corpus dirixíu, sobre too pola ventaxa que supón l'acumulación de gran cantidá de datos comparables que faciliten la tresformación en resultaos estadísticos.

Pa que los resultaos resulten granibles tienen de curiase al másimu les condiciones de *grabación*. Poro, si nun se graba direutamente nel ordenador con un programa fonéticu, ha facese con una grabadora dixital —DAT— y con un micrófonu unidireccional esternu col envís de fuxir de los ruíos del arrastre de la cinta al xirar y otros ruíos del esterior. Buscamos un llugar tranquilu, anque nun ye menester facer les grabaciones nuna sala anecoica ya insonorizada porque resulta una situación que siempres resta naturalidá a los informantes y presenta más torgues que ventaxes.

Cuando finamos les grabaciones el llabor prosigue con otros munches xeres: en primer llugar dixitalizamos la señal con un programa informáticu que permite guardar les muestras, d'una nuna, n'archivos de soníu con estensión *wav*. Etiquétense siguiendo un modelu xeneralizáu qu'indica la fastera, l'informante, la muestra y la modalidá oracional. Darréu llímpiate la señal de ruíos indeseaos col programa *Goldwave* y queden los ficheros preparaos pa entamar tola riestra de subrutines programaes n'otru programa nomáu *Matlab*. Esti val pa segmentar les vocales d'un enunciáu nun oscilograma, y estrayer la so duración, intensidá y frecuencia fundamental. Esta información queda recogida de mou automáticu en ficheros de testu (*txt*) colos que se puen facer les medies y gráficos cola curva d'entonación. El mesmu programa tien un protocolu de síntesis que crea unos ficheros que s'emplegarán na fase de perceición.

III. AMPER-ASTUR

Tres convidamos a participar na *III Jornada Científica AMPER* n'avientu de 2003, articulóse un grupu d'investigación n'Asturies cola fin d'analizar—como ya dicímos arriba— la prosodia del asturianu, el gallegu-asturianu y el castellanu faláu n'Asturies. Darréu desplicaremos los puntos d'encuesta y les adautaciones metodolóxiques que foron necesaries, al tiempu qu'espondremos los fautores más xenerales qu'esixéron esti tipu d'axustes.

Demientres la idea dende Europa yera la d'encuestar nun solu puntu de la xeografía asturiana, dende la proximidá paecíos más conveniente analizar los rasgos prosódicos de la fastera oriental, central y occidental, asina como la zona asitiada ente El Navia y L'Eo. Na fastera central —que ye la que tamos estudiando en primer llugar— decidimos entamar poles diferencies ente la particular entonación de Mieres y la d'Uviéu. Per un llau, nun mos paecía la de Mieres representativa de tol centru d'Asturies y, per otru, nun querímos prescindir del análisis de tan carauterística melodía.

Al día de güei, encuestamos n'Uviéu y en Mieres con informantes de zona rural y urbana.

3. 1. Adautación del corpus

El primer pilancu que se mos plantegó foi la traducción del corpus xeneral d'AMPER al asturianu, por razones fonétiques, morfosintáutiques y del entornu. Ye evidente que'l calcu de los enunciaos nun siempre daba pallabres colos mesmos soníos n'asturianu nin cola mesma distribución del acentu. Un *corpus «ad hoc»* adecuáu tenía qu'incluir una repartición determinada de pallabres agudes, llanes y esdrúxules, axustaes a delles restricciones fonétiques. Estes esixencies lleváronnos a guetar vocablos col mayor número de consonantes oclusives posible o, polo menos sordes, de manera que se mos facilitara la segmentación de la señal. Asina algamamos con mayor precisión datos como son la duración de les vocales, la so intensidá y la so frecuencia fundamental. D'otra miente buscamos secuencias que resultaren cómodes y cercanes a los informantes, razones estes que nos llevaron a la creación d'un corpus propiu. Sin embargu, la xera foi más complicada de lo qu'esperábemos daes toes estos restricciones de les que venimos falando.

Por poner dalgún exemplu, *el rapacín xugaba col pitín* foi una de les secuencias elexíes pero hasta llograr 63 modelos diferentes nos que varía la distribución acentual —*el rapacín xugaba n'equipu, el rapacín xugaba col páxaru*— teniendo en cuenta'l SN1 el SN2 y les sos espansiones, foi necesario facer dellos axustes: *El paquete llevaba pegamín, el paquete llevaba pelotes, el paquete llevaba plátanos...*


Cuando vemos lo complexa que resulta la creación d'esti corpus ye fácil atalantar el porqué del manexu de secuencias tan rebuscaes. Esto supunxo un esfuerzu pergrande a la hora d'intentar qu'estes frases foren diches con naturalidá, de mou que tuvimos de contestualizales al máximu pa que l'informante col testu delantre afirmare ensin dubia que *el rapacín xugaba col pitín* o entrugare si *¿el rapacín xugaba col pitín?*

Durante la grabación emplegamos tou tipu de recursos a la gueta de la naturalidá, lo que nun resultó fácil sobre too cuando los informantes teníen de repetir tres vueltes cada enunciáu del corpus «*ad hoc*» en modalidá assertiva y otres tantes n'interrogativa. Por eso facíemos les grabaciones con descansos y en díes distintos y solíemnos falar col informante de mou que s'ase-meyara a una conversación, diciendo-y: *Entrúga-y a esa qué llevaba esi paquete, paezños que llevaba pegamín, nun tamos seguros, entrúga-ylo a ella.* Coles frases escritas delantre, l'informante tenía qu'entrugar *¿El paquete llevaba pegamín?* Nesta mesma situación y nun casu concretu d'una informante de Mieres suxirióse-y qu'emplegara un vocativu familiar y que maxinara que la entruga diba pa esa persona. Asina la entonación ganó muncha naturalidá cuando dicía *Mama, ¿el paquete llevaba pegamín?* Con esti y otros procedimientos consiguimos superar les munches torgues que planteguen esti tipu d'encuestes.

Los corpus «ad hoc» nos que se presenten una riestra d'enunciaos que l'informante tien que pronunciar desendólquense polo xeneral nuna grabación cola entonación propia de la llectura en serie o del monólogu. Pa evitalo, na medida lo posible, tuvimos dos de les encuestadores falando constantemente col informante de mou que convertimos les sos entrugues y afirmaciones en secuencias dirixíes pero perfectamente integraes nuna tertulia.

La ellaboración del *corpus inducúu* y el procesu de la encuesta ficiéronnos reflexonar sobre dellos aspeutos rellacionaos col entornu onde se realiza l'estudiu. El corpus del que partíemos foi proporcionáu pol equipu investigador de Barcelona y nun s'axustaba mui bien a les nueses necesidaes tanto pa encuestar na zona rural como urbana. Por poner un exemplu, creaba situaciones nes que l'informante tenía que falar nel ascensor o saludar al porteru del edificiu y esto nun son realidaes que resultaren cotidianas pa los nuesos informantes. Asina que nosotros camudamos la situación maxinada al ámbitu d'un hospital onde daquíen llega por un accidente non mui grave y tien de face-y entrugues al mélicu y demás personal sanitario.

La xera de mapa sufrió namái qu'una adautación nos topónimos ente los qu'incluyimos *Picu Quetu*, *Cabu Peñes*, *Ríu Tapo*, *Golfu Capitu*, *campu patates*....



3.2. Dalgunos resultaos entonativos


Como veníemos diciendo hai dellos elementos que faen qu'una comunidá llingüística se reconoza como tala. Ente ellos podemos destacar la entonación como ún de los más carauterísticos. No que cinca al asturianu paecíos perimportante afondar na entonación d'una fastera qu'amuesa unes diferencies al oyíu que resulten fácilmente perceptibles. Entós, entamamos el nuesu trabayu pel estudiu de la entonación de la zona de Mieres col envís d'algamar la cono-cencia de los rasgos que conformen esta variedá y les razones que la faen tan identitaria pa los falantes de tol dominiu.

El trabayu fechu hasta agora compónse d'un análisis de los resultaos entonativos del conceyu de Mieres que cumple los preceutos establecíos dende AMPER. Los datos que vamos presentar correspuenden a resultaos de la fastera urbana, inda qu'en futures investigaciones estos sedrán comparaos colos de la fastera rural.

3.2.1. Análisis de la frecuencia fundamental


Feches les primeres midiciones pudimos comprobar que la curva d'entonación n'asertives ya interrogatives ye asemeyada, magar que nes interrogatives ye permuncho más alta que nes asertives, tanto na frecuencia media del falante como na máxima y na mínima. Tamién ye de destacar el tonema final descendente qu'apaez tanto pa los enunciaos asertivos como pa los interrogativos cola sola esceición, nestos caberos, de los que finen en pallabra aguda, nos que pudimos ver una llixera subida na última sílaba.

Figura 1. Aguda asertiva/interrogativa.




El rapacín piquiñín xugaba col patín / ¿El rapacín piquiñín xugaba col patín?

Figura 2. Llana asertiva/interrogativa.



El paquete llevaba pelotes / ¿El paquete llevaba pelotes?

Figura 3. Esdrúxula asertiva/interrogativa




El páxaru pícaru xugaba col plásticu / ¿El páxaru pícaru xugaba col plásticu?

Esti patrón entonativu vien a corroborar les intuiciones manifestaes por M^a Xosefa Canella-da (1984: 23) nel so trabayu «Notes de la entonación asturiana», onde diz:

«En cuanto a la interrogación asturiana, a mi parecer, hay que colocarla en el gran grupo del comportamiento occidental peninsular. Lo mismo que el portugués, posiblemente el gallego y también el extremeño, el tipo básico de pregunta hay que adscribirlo no a la pregunta absoluta castellana, de final ascendente, sino a la pregunta de final descendente.»


Como se pue ver na figura 4, la evolución de la curva entonativa na fala castellana amuesa un final marcáu n'anticadencia na modalidá interrogativa, que contrasta colo que víamos hasta'l momentu nes realizaciones n'asturianu.

Figura 4. Curves asertiva ya interrogativa del castellanu



Del mesmu mou, los resultaos d'AMPER pal gallegu amuesen una tendencia asemeyada nel tonema final (véase figura 5), fechu que contrasta abondo col casu del castellanu nel que, siguiendo l'exemplu de T. Navarro Tomás, describese'l tonema final de les interrogatives como n'anticadencia. La non diferenciación na fala de Mieres de la direición que tomen los tonemes finales n'asertives ya interrogatives vien a amosar que pa marcar les distintes modalidaes oracionales nun ye bastante'l movimientu de la frecuencia fundamental sinón tamién la duración ya intensidá silábica.

Figura 5. Curves asertiva ya interrogativa del gallegu




3. 2. 2. Análisis de la intensidá

Otru parámetru qu'hai que considerar nel análisis del patrón entonativu de les dos modalidaes ye la evolución de la intensidá a lo llargo del enunciáu, midida nes vocales que lu constituyen.

Los gráficos siguientes amuesen que lo perdiéntente ente asertives ya interrogatives ye un caltenimientu continuu d'una intensidá alta en tola llínea melódica de les posterres, amás d'una baxada gradual nes asertives qu'entama dende un principiu y acentúase al final, nel marxe posnuclear del enunciáu:

Figura 6. Intensidá




3. 2. 3. Duración

El postrer parámetru acústicu qu'analizamos foi'l de la duración de les vocales en toles posiciones del enunciáu, pa pallabres agudes, llanes y esdrúxules, cola fin d'observar si esisten grandes diferencies en dambes modalidaes.

No que cinca la duración los resultaos nun son dixebranos en forma de les teoríes tradicionales: más duración nes sílabes tóniques y, sobre too, na cabera sílaba de la secuencia nos enunciaos interrogativos. Esta duración vien a coincidir col movimientu final de la curva.

Figura 7. Intensidá interrogatives



Podemos destacar, según paez, que ye daqué peculiar na fala de Mieres la xunión d'un allargamientu nes sílabes tóniques en posición final nos enunciaos interrogativos con un final en cadencia. Amás d'ello, nel casu les agudes la coincidencia de la sílaba tónica col tonema de xuntura final fai qu'esti allargamientu seja entovía mayor. Pa desplicar esti peculiar comportamientu esti equipu investigador baraxa la hipótesis de que l'allargamientu d'esta vocal produzse pola xubida del tonema na última sílaba que nun alcuentra posibilidá nenguna de baxar por non esistir una sílaba posterior.

Mientras que n'otres zones —Cataluña— paez qu'hai poca diferencia ente asertives ya interrogatives en cuantes a la intensidá y la duración, de mou que la inflesión del F0 ye lo más diferenciador, les nueses investigaciones apunten a otros resultaos³.

L'estudiu completu de los patrones entonativos qu'uifierten estos 378 secuencies analizaes proporcionómos información perinteresante sobre'l conxuntu de rasgos prosódicos del asturianu de Mieres. Pero pa corroborar estos datos tendremos que seguir trabayando na síntesis y ampliando la nuesa investigación.

3. 2. 4. Síntesis de la fala

Pa la confirmación de los patrones entonativos resultantes de cada fastera, el proyeutu AMPER prevé una última fase que consiste na realización d'un test de perceición a un grupu de falantes del mesmu llugar, incluyíu l'informante de les muestres, cola fin de comprobar si, desaniciando'l conteníu léxicu, sólo cola síntesis de la melodía, se distingue la modalidá oracional. Al día de güei sóli ficimos un pequeñu test d'aproximación nel que, ensin tener resultaos concluyentes, podemos aventurar una tendencia que paez corroborar les nueses hipótesis aniciales.

Desplizamos darréu'l procedimientu que seguimos: analizaes les 378 grabaciones, foron sometíes a un procesu de síntesis acordies coles normes d'AMPER, onde resulten archivos de soníu coles melodíes de les secuencies nes que se caltienen les variaciones de la frecuencia fundamental y la duración. Estos archivos ufriéronse en forma de test auditivu a dalgunos falantes mierenses.

El test de perceición llevóse a cabu con 26 muestres, 22 procedentes de Mieres y 4 d'una in-

³ Ana M^a FERNÁNDEZ PLANAS, Eugenio MARTÍNEZ CELDRÁN, Carlos VAN OOSTERZEE, Valeria SALCIOLI, Joan CASTELLUÍ, Dora SZMIDT SIERYKOW, «Proyecto AMPER: estudio contrastivo de frases interrogativas sin expansión del barceloní y del tarragoní».

Eugenio MARTÍNEZ CELDRÁN, Ana M^a FERNÁNDEZ PLANAS, Valeria SALCIOLI, Josefina CARRERA, Janina ESPUNY, «Aproximación a la prosodia del dialecto de Barcelona».

formante d'Uviéu, cola fin de comprobar si los patrones entonativos d'esti conceyu foren detectaos como anómalos polos falantes de Mieres.

Efeutivamente, la discriminación foi más acertada nel casu de les secuencies emitíes polos falantes de Mieres, mentanto que la reconocencia del patrón entonativu d'Uviéu xeneró más problemes. Polo demás, les asertives foron les secuencies qu'ufiertaron más errores de percepción, quiciabes porque los elementos que conformen el patrón entonativu de les interrogativas son más fáciles de discriminar pa los oyentes. Pero la información más valorable, en tanto que confirma les conclusiones que s'estraxeron del análisis de les curves entonatives, ye la que cinca nes variaciones del patrón tonal de les dixebras secuencies: Los errores de percepción foron más numerosos —per esti orde— nes asertives esdrúxules y llanes que nes agudes.

L'aciertu na percepción de les secuencies asertives agudes en casi tolos casos corrobora que se trata d'una curva entonativa muncho más diferente respeuto del so patrón interrogativu correspondiente. Asina ye qu'elli xenera una curva dixebrada de les asertives non sólo en tol recorriu sinón tamién na parte cabera del tonema final onde tenemos una llixera xubida. La dificultá na distinción de la curva melódica nos enunciaos formaos por pallabres llanes y esdrúxules débese a la semeyanza ente la baxada del tonema final (véase figures 2 y 3), nes asertives ya interrogativas. La diferencia nun tenemos por más de buscala na evolución global de tola curva entonativa. Ciertamente, nun paez qu'esto resulte tan concluyente pa la discriminación como una evolución diverxente na dirección del tonema final, sobre too nes secuencies sintetizaes.

Pa finar, sólo mos queda esperar qu'esti trabayu contribuya a una descripción detallada de la entonación nes dixebras fasteres d'Asturies que resulte granible pa la comparanza de los nuesos patrones entonativos colos d'otres llingües, amás d'otres aplicaciones práctiques nel ámbitu de la teunoloxía de la fala.

BIBLIOGRAFÍA

- CONTINI, M.; LAI, J.P.; A. ROMANO y S. ROULLET (2002) : «Vers un Atlas prosodique parlant des variétés romanes», en *Sempre los camps auràn segadas resurgantas. Mélanges offerts au professeur Xavier Ravier*, estudios reuníos por Jean-Claude Bouvier, Jacques Gourc et François Pic, Toulouse, Université de Toulouse-Le Mirail FRA-MESPA (France Méridionale et Espagne), Collection « Méridiennes »: 73-85.
- CONTINI, M.; J. P. LAI y A. ROMANO (2002): «La géolinguistique à Grenoble: de l'ALIR à l'AMPER», en M. R. Simoni-Aurembou (éd.), *Nouveaux regards sur la variation diatopique*, *Revue belge de Philologie et d'Histoire* 80, 3 : 931-941.
- CONTINI, M.; J. P. LAI; A. ROMANO; S. ROULLET; L. DE CASTRO MOUTINHO; R. L. COIMBRA; U. PEREIRA BENDIHA y S.S. RUIVO (2002): «Un Projet d'Atlas Multimédia Prosodique de l'Espace Roman», en Bel B., Marlien I. (eds.), *Proceedings of the 1st International Conference on Speech Prosody, 11-13 April 2002*. Aix-en-Provence, La-

- boratoire Parole et Langage: 227-230. Tamién disponible en: <http://www.lpl.univ-aix.fr/sp2002/papers.htm>.
- DE CASTRO MOUTINHO, L.; R. L. COIMBRA; S. S. RUIVO y U. PEREIRA BENDIHA (2001): «Atlas Prosódico Multimédia: Curvas de uma Trajectória», n'Actas do XVI Encontro da Associação Portuguesa de Linguística. Lisboa, APL: 387-391.
- (2001-2002a), «Atlas Prosódico Multimédia das Variedades Românicas: Estudos Preliminares», en Barker A.D. (coord.), *Europa: Realidade e Fantasia. Uma Colectânea de Ensaios*. Aveiro, Universidade: 75-84.
- (2001-2002b) «Project d'Atlas Prosodique Multimedia des Variétés Romanes. Contribution Portugaise», en *Tra-vaux de l'Institut de Phonétique de Strasbourg* (TIPS) 31 : 61-70.
- DE CASTRO MOUTINHO L. y R. L. COIMBRA (2000-2001): «Para a Construção de um Atlas Prosódico Multimédia das Variedades Românicas», en *Revista da Universidade de Aveiro - Letras* 17: 111-118.
- FERNÁNDEZ PLANAS, A. M.; E. MARTÍNEZ CELDRÁN; C. VAN OOSTERZEE; V. SALCIOLI; J. CASTELLUÍ y D. SZMIDT SIERYKOW (s.a.): «Proyecto AMPER: estudio contrastivo de frases interrogativas sin expansión del barceloní y del tarragoní», <http://www.ub.es/labfon/projec.htm>
- LAI, J. P. y A. ROMANO (2002): «Etat d'avancement du projet: Atlas Multimédia Prosodique de l'Espace Roman (AMPER)», en *Bollettino dell'Atlante Linguistico Italiano III. Serie-Dispensa* 26: 199-203.
- MARTÍNEZ CELDRÁN, E.; A. M. FERNÁNDEZ PLANAS; V. SALCIOLI; J. CARRERA y J. ESPUNY (2004): «Aproximación a la prosodia del dialecto de Barcelona», en *Géolinguistique* [imprentándose].
- MUÑIZ CACHÓN, C.; M. J. LÓPEZ BOBO; R. GONZÁLEZ RODRÍGUEZ; M. CUEVAS ALONSO y L. DÍAZ GÓMEZ (2004): «Algunas notas acerca de la entonación en asturiano», en *xxiv Congreso Internacional de Lingüística y Filología Románica 2004. Aberystwyth (RU), 1-6 de agosto de 2004*.
- NAVARRO TOMÁS, T. (1994) *Manual de entonación española*, Madrid, Guadarrama, 1974.